

4. november 2007

UKA 2007/12

UPA 2007/50

**Tusagassiuisarnermi akisussaassuseqarneq pillugu Inatsisartut inatsisissaattut  
siunnersuut**

**pillugu**

**Inatsisartut Kultureqarnermut Ilinniartitaanermullu Ataatsimiititaliaata**

**ISUMALIUTISSIISUTAA**

**Siunnersuutip aappassaaneerpeqarnerani saqqummiunneqartoq**

Inatsisartut Kultureqarnermut Ilinniartitaanermullu Ataatsimiititaliaat  
suliarinninnermini ukuninnga inuttaqarpoq:

Inatsisartunut ilaasortaq Kristian Jeremiassen, Atassut, siulittaasoq  
Inatsisartunut ilaasortaq Ruth Heilmann, Siumut, siulittaasup tullia  
Inatsisartunut ilaasortaq Doris Jakobsen, Siumut  
Inatsisartunut ilaasortaq Juliane Henningsen, Inuit Ataqatigiit  
Inatsisartunut ilaasortaq Lene Knüppel, Demokraatit  
Inatsisartunut ilaasortaq Otto Jeremiassen, Siumut (sinniisussaq)  
Inatsisartunut ilaasortaq Johan Lund Olsen, Inuit Ataqatigiit (sinniisussaq)

14. marts 2007-imi siullermeerinerup kingorna inatsisissatut siunnersuut  
ataatsimiititaliap misissorpaa makkuninngalu oqaaseqaateqassalluni:

**Siunnersuutip imarisaa**

Kalaallit Nunaanni tusagassiuisarnermi akisussaannermut apeqquutit pillugit  
maleruagassiorsinnaanermut oqartussaassuseq Namminersornerullutik Oqartussat  
2000-imi tiguaat. Tusagassiuisarnermi akisussaaffik pillugu Inatsisartut  
inatsisissaattut siunnersuummik Kultureqarnermut, Ilinniartitaanermut,  
Ilisimatusarnermut Ilageeqarnermullu Naalakkersuisoq maanna saqqummiussivoq.  
Taamaalilluni tusagassiuisarnermut tunngatillugu nunatsinni maleruagassiaq siulleq  
danskut inatsisaannut atuuttumut taartaasussaq siunnersuutikkut  
saqqummiunneqarpoq.

Tusagassiuisarnermi akisussaassuseqarneq pillugu maleruagassanik aalajangersaanermi kiffaangissuseqarluni oqaaseqarsinnaatitaanerup, innuttaasut ilisimatinneqartussaataitaanerisa aammalu oqartussaaqatigiinnerup aqqani aalajangiisarnermi tusagassiutit inissisimanerisa taamalu inuup innarlerneqannginnissamut illersugaanerata sapinngisamik oqimaaqatigiissaarnissaat siunnersuummi aallaavigineqarput. Tusagassiuteqarneq sulianik toqqammavilik, isornartorsiuerpalaartoq inuiaqatigiinnilu kiffaangissuseqartumik inissisimasoq inuiaqatigiinni kulturikkullu mianerisassanut ataqatigiissillugu Naalakkersuisunit isiginiarneqarsimavoq.

Tusagassiutitigut saqqummiussaqaqarnermut atasumik innuttaasut ataqqinassusiat innarlerneqartillugu kina akisussaasuunersoq tusagassiuisarnermi akisussaassuseqarneq pillugu inatsisissatut siunnersuutikkut naqissuserneqarpoq aammalu oqaaseqaatinut tusagassiutitigut saqqummersunut kiap akisussaanerata nalornissutigineqarsinnaannginnissaa Inatsisartut inatsisaatigut siunertarineqarluni. Tamatumani tusagassiutitigut kiffaangissuseqarluni oqaaseqarsinnaatitaanerup sapinngisamik pitsaanerpaamik atugassaqaartinneqarnissaata qulakkeerneqarnissaa siunertarineqarluni.

Siunnersuut naapertorlugu Kalaallit Nunaanni Tusagassiuisarneq pillugu Aalajangersaasarfimmi ilaasortassanik toqqaasussat tassaapput Naalakkersuisut. Tusagassiornermi ileqqorissaarnissamik innersuussutit unioqqutillugit avammut saqqummiussisoqarsimanersoq Tusagassiuisarneq pillugu Aalajangersaasarfiup aalajangiiffigisassavaa.

Kiisalu digital atorlugu nutaarsiassaqaqtitsivinnik ingerlatsiviit saqqummerarnerisa malitsigisaanik digital atorlugu nutaarsiassaqaqtitsivinnik ingerlatsiviit inatsimmi ilanngunneqarsinnaanerannut periarfissat pitsaanerulersinneqarnissaat inatsisissatut siunnersuummi siunnersuutigineqarpoq. Tassunga atatillugu digital atorlugu nutaarsiassaqaqtitsivinnik ingerlatsiviit sorliit inatsisip ataani inissisimassanersut Tusagassiuisarneq pillugu Aalajangersaasarfiup aalajangiiffigisassagaa siunnersuutigineqarpoq.

### **Inatsisissatut siunnersuutip tusarniaassutiginera.**

Tusarniaaneq pillugu Kultureqarnermut, Ilinniartitaanermut, Ilisimatusarnermut Ilageeqarnermullu Pisortaqaqfiup allakkiaa malillugu tusarniaaneq 12. december 2006-imit 12. januar 2007-imut ingerlanneqarpoq. Tusarniaaffigineqartut pillugit inatsisissatut siunnersuummut nalinginnaasumik nassuiaatit innersuussutigineqarput. Kalaallit Nunaanni Eqqartuussisuunerup tusarniaanermut akissuteqaataa 12. april 2007-imi ataatsimiititaliamit aatsaat tiguneqarmat ataatsimiititaliamit matumuunakkut erseqqissaatigineqassaaq. Tusarniaanermut akissut kingusinaartumik nassiunneqarpoq, taamaattorli Kultureqarnermut, Ilisimatusarnermut Ilageeqarnermullu Pisortaqaqfimmit ulloq 29. marts 2007-imi tiguneqarsimalluni. Tusarniaanermut akissut ingerlaannartumik ingerlatseqqinneqarsimangimmat ataatsimiititaliamit ajuusaarutigineqarpoq.

Tusarniaanermi akisut isummersuutini paasissutissanillu pingaarutilinnik nutaanillu imaqarpoq (Ilanngussaq 1).

Siunnersuut pineqaatissiissutissanut aalajangersakkanik aammalu taarsiissuteqarnissamut akisussaaneq pillugu aalajangersakkanik imaqartoq inatsisissatut siunnersuutip tusarniaassutigineqarneranut ataatsimoortumik akissummi Nunatta Eqqartuussiviata Tusagassiuisarnerlu pillugu Aalajangersaasarfiup tikkuarpaat. Pisinnaatitsissummik inatsimmi Folketingimit akuersissutigineqarsimasumi erseqqissumik tunngavissinneqarsimanngippat maleruagassanik taamaattunik Inatsisartut atuussinnaassuseqartumik aalajangersaasinnaanerat Nunatta Eqqartuussivianit Tusagassiuisarnerlu pillugu Aalajangersaasarfimmu qularineqarpoq. Apeqqutip tamatuma erseqqinnerusumik misissorneqarnissaa Nunatta Eqqartuussiviata Tusagassiuisarnerlu pillugu Aalajangersaasarfiup kaammattuutigaat. Tusagassiuisarnermi akisussaassuseqarneq pillugu inatsimmi pineqaatissiisinaanermut aalajangersakkat inatsimmik tunngaveqanngissinnaanerannik, taamaalillutillu atuussinnaassuseqanngissinnaanerannik apeqqummut tunngasut qularutigineqaqqunagit apeqqummut Inatsisunik Atortitsinermut Ministerip naliliineranik inatsisissatut siunnersuummik aappassaaneerinissaq sioqqullugu piniaqqullugit Naalakkersuisut ataatsimiititaliamit 23. juli 2007-imi allakkakut qinnuigineqarput (Ilanngussaq 2). Ataatsimiititaliaq akissummiq sulitigusaqanngilaq.

### **Ataatsimiititaliap siunnersuummik suliarinninnera**

Siullermeerinermi siunnersuut partiinit amerlanerussuteqartunit tunngaviusumik taparserneqartoq Inatsisartut Kultureqarnermut Ilinniartitaanermullu Ataatsimiititaliaata maluginiarpaa.

Ataatsimiititaliap suliarinninneranut atatillugu apeqqutit arlallit qulaajaaffiginissaat siunertaralugu ataatsimiititaliaq Kulturimut, Ilinniartitaanermut, Ilisimatusarnermut Ilageeqarnermullu Naalakkersuisumut saaffiginnissuteqarsimavoq. Ataatsimiititaliap allagaa 22. marts 2007-imeersoq kiisalu Naalakkersuisunut ilaasortap akissutitut allagaa 27. marts 2007-imeersoq isumaliutissiissummut matumunnga ilanngussatut 3-tut ilanngunneqarput.

Tusagassiuisarnermi akisussaassuseqarnermut paatsuugassaannngitsunik sinaakutissaqarnissaq ataatsimiititaliamit pingaartinneqarpoq. Taamaattumillu tusagassiuisarnermi akisussaassuseqarneq pillugu Inatsisartut inatsisissaattut siunnersuut ataatsimiititaliamit tikilluaqquneqarpoq. Immikkoortoq taanna pillugu nunatsinni namminerisatsinnik inatsiseqalernissatsinnut piffissanngortoq Naalakkersuisut assigalugit ataatsimiititaliaq isumaqarpoq.

Ineriartorneq taanna pissusissamisoortutut ataatsimiititaliamit isigineqarpoq. Kalaallit Nunaata nammineerneruleriartornissaanik ilungersuuteqarnerput aamma eqqarsaatigalugu tusagassiuisarnermi akisussaassuseqarneq pillugu nunatsinni namminerisatsinnik inatsiseqarnissarput pisariaqartipparput. Innuttaasut taamatullu

tusagassiorfiit tatiginissinnaanerannut qulakkeerinnittussatut Tusagassiuisarneq pillugu Aalajangersaasarfiup arlaannaannulluunniit attumassuteqannginnissaa ataatsimiititaliamit pingaartinneqarpoq.

Peqatigiiffiup saaffiginnissuteqarnera tunngavigalugu Kalaallit Nunaanni Tusagassiorlut Peqatigiiffiat ataatsimiititaliamut ulloq 11. april 2007-imi sassartitsivoq (Ilanngussaq 4). Tamatuma kingorna The World Association of Newspapersimut allaqatiginnissutit nuutinneri (Ilanngussaq 5) Naalackersuisunit ataatsimiititaliap tiguai kiisalu Danskít Tusagassiorlut Peqatigiiffianit saaffiginnissummik (Ilanngussaq 6) ataatsimiititaliaq tigusaqarpoq. Ilaatigut tamanna tunngavigalugu immikkoortup aappassaaneernejarnissaata Inatsisartut 2007-imi ukiakkut ataatsimiinnissaannut kinguartinneqarnissaa ataatsimiititaliap qinnutigaa. Kingullertut Kalaallit Nunaanni Tusagassiuisarneq pillugu Aalajangersaasarfiup Naalackersuisunut ilaasortamut 16. august 2007-imi saaffiginnissutaata nuutinnera (Ilanngussaq 7) ataatsimiititaliamut ilisimatitsissutigineqarpoq. Tusagassiuisarneq pillugu Aalajangersaasarfiup siulittaasuata inatsisilerinermik ilinniagaqartuunissaata siunnersuutaqqaartumi allassimannginnera ataatsimut pingaarnertullu uparuarnejarpoq. Kiisalu siulittaasup Naalackersuisunit toqqarneqartarnissaa assut isornartoqartinneqarpoq, taamaalillunimi aalajangersaasartut naalackersuinikkut ingerlatsisunut attuumassuteqannginnerat apeqqusernejarsinnaammat. Taamaalillunilu assersuutigalugu Tusagassiuisarneq pillugu Aalajangersaasarfiup siulittaasua ima erseqqissaateqarpoq: "Inatsisinut tunngasumik ilisimasaqarnerup, siulittaasup piginnaasaqarfigisariaqagaata, saniatigut siulittaasoq aamma attaviitsuusariaqarpoq. Siulittaasoq attaviitsuuginnarani aammali qinerseriaaseq aalajangersimasoq naapertorlugu qinigaasimasariaqarpoq, taamaalilluni siulittaasup ilumut attaviitsuunera inuit ataasiakkaat tusagassiuutillu tatiginiassammassuk. Naalackersuisut pisariaqanngitsumik isornartorsortinnissaq politikikkullu akuleruttutut pasillernejarnissaq pinngitsoortinniarlugu pisortaqarfik attaviitsoq siulittaasunngortinneqartussamik innersuussuteqartissavaat. Eqqartuussiveqarfiit, Inatsisartunut Naalackersuisunullu attaveqanngitsut, taamatut attaviitsuunissamik qulakkeerinninnissamat piukkunnarnerpaajupput." (Ilanngussaq 7).

Naalackersuisunut ilaasortap allagaanik ataatsimiititaliaq ulloq 2. oktober 2007-imi tigusaqarpoq, tassani aappassaaneerinissaq sioqqullugu inatsisissatut siunnersuummut allannguutissatut siunnersuuteqarnissaq naatsorsuutigineqarsinnaasoq paasissutissiissutigineqarpoq (Ilanngussaq 8). Apeqqutit erseqqissaatigineqartut eqqarsaatigalugit allannguutissatut siunnersuuteqarnissaq ataatsimiititaliamit ilassilluarnejarpoq. Taamaattumillu Tusagassiuisarneq pillugu Aalajangersaasarfiup siulittaasuata inatsisilerituujunissaa allannguutissatut siunnersuutiminni Naalackersuisut erseqqissaatigilersaarmassuk ataatsimiititaliap nuannaarutigaa.

Taamaalilluni Tusagassiuisarneq pillugu Aalajangersaasarfiup siulittaasuata inatsisilerituujunissaa **ataatsimiititaliap isumaqatigiittup** taperserpa.

Aalajangersaasarfiup arlaannaannulluunniit attuumassuteqannginnissaa qulakkeerumallugu tusagassiorlut peqatigiiffianit tusagassiuutillu aaqqissuisoqarfiannit ilaasortatut toqqagassat affaannangortinneqartariaqartut

**ataatsimiititaliaq isumaqatigiittoq** isumaqarpoq. Ilaasortat katitigaanissaannut siunnersuut naapertorlugu tusagassiuitit sinniisaat aalajangersaasarfimmi amerlanerussuteqassapput, tamannalu annertuumik ajornartorsiutissartaqartutut ataatsimiititaliamit isigineqarpoq.

**Pinngaartumik Tusagassiineq pillugu Aalajangiisartunut allattoqarfimmullu aningaasartuutit pillugit, tak. Inatsisissatut siunnersuummi § 52**

Inatsisissatut siunnersuummi § 52, imm. 3-mi allassimavoq, Naalakkersuisut aalajangersinnaagaat, Tusagassiuitit pillugit Aalajangiisartut, tassungalu ilanngullugu allattoqarfik, sulinerinut atatillugu aningaasartuutit tusagassiuitit Tusagassiuitit pillugit Aalajangiisartut suleriaasiat malillugu agguataagaasumik akilerneqartassat. Suleriaaseq taanna aalajangersarneqassaaq Naalakkersuisut aalajangersagaat imm. 1 malillugu.

Aaqqiinerli taanna naapertuuttutut Kultureqarnermut Ilinniartitaanermullu Ataatsimiititaliamit isumaqarfigineqanngilaq.

Tusagassiineq pillugu Aalajangiisartut ingerlanneqarnerannut tusagassiuitit aningaasartuuteqartinneqarnissaannut tunngavissat atorluarneqarnissaat maannakkorpiaq Naalakkersuisut eqqarsaatiginngikkaat isumaliutissiisummi ilanngussaq 3-mi takuneqarsinnaasutut Naalakkersuisut ilisimatitsissutigaat. Inatsisinik aalajangersaanissaq inissaminiinngitsoq tunngaviusumik ataatsimiititaliaq isumaqarpoq, atorluarnissaanut najoqqutassianik ersarissunik ilanngullugu Naalakkersuisut tamatuma peqatigisaanik ersersitsinngimmata.

Tassunga ilanngullugu Tusagassiuitit pillugit Aalajangiisartuni allaffissornikkut sipaarutaalerumaartunut atatillugu aningaasartuutit matussusiivigeqqullugit peqquneqarnissaanut tunngavissamik pissarsinissaq atortariaqaraa aqutsinermut maannakkut ilusilernerneqarnermini pissusissamisuunngitsumik kajumilersitsissasoq ataatsimiititaliaq isumaqarpoq.

Tusagassiuisarnermi akisussaassuseqarneq pillugu inatsit danskit inatsisaat maliinnangajavillugu allataavoq. Danskit tusagassiuutaannut aningaasatigut ingerlalluartunut Tusagassiineq pillugu Aalajangiisartut atuunnerinut aningaasartuutit matussuserneqarnissaannut malunnaatilimmik sunniuteqarnissaa ilimanangilaq. Tusagassiuinerli pillugu Aalajangiisartut ingerlanneqarnerannut aningaasartuutaajumaartussat kalaallit tusagassiuutaannut aningaasaqarnikkut pissakinnerusumut aningaasatigut pitsaanngitsumik kinguneqarnissaa ilimanartorujussuusoq ataatsimiititaliaq isumaqarpoq, matumani ilanngullugit piffinni TV-qarfiit, piffinni aviisit il.il.

Aalajangersakkap ilusilersorneqarnera ataatsimiititaliamit ataatsimoortumit taparserneqarsinnaanngilaq. Illuatungaaticullu Tusagassiineq pillugu Aalajangiisartut qaninnerusoq ungasinnerusorlu isigalugu aningaasatigut namminersorluni ingerlanissaa inatsisikkut qulakkeerunneqartariaqartoq ataatsimiititaliaq isumaqarpoq.

Tamanna tunngavigalugu inatsisissatut siunnersuummut **allannguutissatut siunnersuut** Kultureqarnermut Ilinniartitaanermullu Ataatsimiititaliap **isumaqatigiittup** saqqummiuppaa. Allannguutissatut siunnersuut ilanngussaq 9-ivoq.

Allannguutissatut siunnersuut **akuersissutigineqassasoq Kultureqarnermut Ilinniartitaanermullu Ataatsimiititaliap isumaqatigiittup** inassutigaa.

## **TUSAGASSIUISARNEQ PILLUGU AALAJANGERSAASARFIUP SIULITTAASUA**

Tusagassiuisarneq pillugu Aalajangersaasarfiup siulittaasussaa Naalakkersuisunit toqqarneqartassasoq **ataatsimiititaliami amerlanerussuteqartut, Siumumeersut Atassummeersut, Inuit Ataqatigiillu** isumaqarput.

Siulittaasup arlaannaannulluunniit attuumassuteqannginnerata apeqquserneqarsinnaassannginnissaa ataatsimiititaliami ikinnerussuteqartunit aalajangiisuusutut isigineqarmat siulittaasup Naalakkersuisunit toqqarneqartarnissaa **ataatsimiititaliami ikinnerussuteqartut, Demokraatit** akuersaarsinnaanngilaat. Naammagittaalliuutinik arlaannaannulluunniit attuumassuteqanngitsumik aalajangersaasarfiup suliarinnittarnissaa qulakkeerneqarsinnaaqqullugu nunatta eqqartuussisuunerata Tusagassiuisarneq pillugu Aalajangersaasarfimmi siulittaasuususaatitaanissaa ikinnerussuteqartunut aalajangiisuusumik pingaaruteqarpoq.

## **TUSAGASSIUUTIT SORLIIT INATSIMMI ILAATINNEQASSANERSUT**

Tusagassiornermut tunngasut sukkasuumik allanngoriartorfiunerat eqqarsaatigalugu Tusagassiuisarneq pillugu Aalajangersaasarfiup qarasaasiakkut tusagassiuutit sorliit inatsimmi ilaatinneqarnissaat pillugu eqaatsumik aalajangiisnaassuseqartinnissaa naapertuuttuussasoq **ataatsimiititaliami amerlanerussuteqartut, Siumumeersut, Atassummeersut Inuit Ataqatigiinneersullu** isumaqarput. Taamaalillunilu aalajangiinerit aalajangersimasut, ataatsimoortumik naliliinermigut, Tusagassiuisarneq pillugu Aalajangersaasarfiup aalajangiiffigisassavai. Tusagassiuutit nutaarsiassanik ingerlatitseqqinertut iluseqassapput assersuutigalugulu partiit nittartagaannut tunngatillugu Naalakkersuisut ataatsimiititaliamut akissuteqaamminni oqaatigaat nittartakkap "piginnittaa" isummerfigineqanngimmat. Taamaalillunilu nittartagaq suliffeqarfimmut, inunntut ataasiakkaanut partiimulluunniit atanersoq apeqqutaatinnagu nittartakkap tusagassiuisarnermi akisussaassuseqarneq pillugu Inatsisartut inatsisaannut ilaatinneqarnissaa Tusagassiuisarneq pillugu Aalajangersaasarfiup toqqarsinnaavaa. Naalakkersuisut naliliipput internetikkut nalinginnaasumik oqallifinni qarasaasiakkulluunniit allaqatigiittarfinni oqaaseqaatit inatsisiliuunnissaat pisariaqartinneqanngitsoq, tassa ilaatigut pineqartut nalinginnaasumik inatsisini ilaatinneqareermata, taakkunungalugu ilaavoq pinerluttulerinermi inatsit. Tamanna

pillugu Naalackersuisut nassuiaataat ataatsimiititaliami amerlanerussuteqartunit tusaatissatut tiguneqarpoq.

Tusagassiuisarneq pillugu Aalajangersaasarfiup inassuteqarnerat tunngavigalugu qarasaasiakkut tusagassiuutit sorliit inatsimmi ilaatinneqassanersut pillugu nalunaarummik Naalackersuisut nassiussisarnissaat ataatsimiititaliamit amerlanerussuteqartunit naatsorsuutigineqarpoq. Tamanna innuttaasut inatsisitigut illersugaanerisa qulakkeerneqarnissaanut aalajangiisuusutut isigineqarmat.

Tusagassiuisarnermi akisussaassuseqarneq pillugu inatsisip ukiuni kingullerni amerlasuuni tusagassiuutitigut ineriartorsimanermut naapertuuttuunissaa aalajangiisuusumik pingaaruteqartoq **ikinnerussuteqartut Demokratit** isumaqarput, taamaaliornikkut peqatigiiffiit, kattuffiit partiillu nittartagaat inatsimmut ilanngunneqarsinnaaqullugit. Taamaattumik internetikkut oqallittarfinni atuisut kinaassutsiminnik taasinatik allagaannut nittartakkanik taakkuninnga piginnittut akisussaatinneqarsinnaasariaqarput, taamaalillutillu Tusagassiuisarneq pillugu Aalajangersaasarfimmu suliasannngortinneqarsinnaasariaqarlutik.

Kingullertut taaneqartoq pillugu Naalackersuisut Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliamut akisuteqaamminni immikkoortoq pillugu inatsisiliorniannnginnertik paasisutissiissutigimmassuk immikkoortumut tunngatillugu Naalackersuisut iliuuseqarnissaannik amerlanerussuteqartut inassuteqaataat naammattutut ikinnerussuteqartunit isigineqanngilaq. Pineqartoq pillugu Naalackersuisut inatsisiliornissamik peqquneqartariaqarput. Saqqummiussat inunnu malersuinertut ilusilerneqarsimasut politiinut unnerluutigineqaannartarnissaat naapertuutinngitsoq ikinnerussuteqartut isumaqarput. Tamanna Tusagassiuisarneq pillugu Aalajangersaasarfimmu ajornannngitsunnguamik aalajangiiffigineqarsinnaagaluartoq eqqartuussiveqarfimmu artukkorsorneqareeqisumi nukinnik atuilussinnarnermik kinguneqarsinnaavoq.

§ 8, imm. 1-imi aalajangersagaq, missingiilluni naliliineq tunngavigalugu Tusagassiuisarneq pillugu Aalajangersaasarfiup inatsisip atuuffianik killiliinissaanik periarfissiisoq, ataatsimiititaliami ikinnerussuteqartut assut apeqquuserpaat. Pisinnaatitaaffimmik annertussusissaannik oqartussaasut namminneq aalajangersaasarnerat ileqquunngilaq. Inatsisip atuuffissai inatsisiliortup nammineq aalajangersagassarai, immikkorluinnarluunniit pisoqartillugu Naalackersuisut nalunaarutikkut aalajangersarsinnaallugit. Ingerlatassalli § 8, imm. 1-imi pineqartut eqqarsaatigalugit Tusagassiuisarneq pillugu Aalajangersaasarfik inatsisiliortutut aammalu atuutsitsisutut/eqqartuussisutut ataatsikkut pisinnaatitaaffilerneqarsinnaanngilaq. Taamatut periaaseqarnikkut innuttaasut inatsisitigut illersugaanerat annertuumik annikillisinneqarpoq, taakkumi maleruagassat suut malittussaanerlugit inatsimmi takusinnaajunnaassammassuk. Taamaattumik § 8, imm. 1-imut allannguutissatut siunnersuummik saqqummiusseqqullugit Naalackersuisut ataatsimiititaliami ikinnerussuteqartunit kaammattorneqassapput, taanna malillugu Tusagassiuisarneq pillugu Aalajangersaasarfiup inassuteqarneratigut ingerlatassat sorliit, § 1, nr. 3-mi tusagassiuutinit taaneqartunit saqqummiunneqartartut, Inatsisartut inatsisaanni

ilaatinneqassanersut pillugu maleruagassanik Naalakkersuisut aalajangersaasassallutik.

**Ataatsimiititaliap inassuteqaatai**

**Ataatsimiititaliaq isumaqatigiittoq allannguutissatut siunnersuummik saqqummiussivoq.**

Tamatuma saniatigut Naalakkersuisut allannguutissatut siunnersuutitut saqqummiutissalugu neriorsuutigisaat akuersissutigineqassasoq **ataatsimiititaliami amerlanerussuteqartut Siumumeersut, Atassummeersut, Inuit Ataqtiginneersullu** inassutigaat.

**Ataatsimiititaliami ikinnerussuteqartup Demokraatneersup** siunnersuut itigartitsissutigineqassasoq inassutigaa.

Taama oqaaseqarluni Inatsisartut Kultureqarnermut Ilinniartitaanermullu Ataatsimiititaliaata siunnersuut aappassaaniigassanngortippaa.

Kristian Jeremiassen,  
siulittaasoq

Ruth Heilmann

Otto Jeremiassen

Johan Lund Olsen

Lene Knüppel

---

[Ilanngussaq 1](#)

[Ilanngussaq 2](#)

[Ilanngussaq 3a](#)

[Ilanngussaq 3b](#)

[Ilanngussaq 4](#)

[Ilanngussaq 5a](#)

[Ilanngussaq 5b](#) (kalaallisut)

[Ilanngussaq 5b](#) (tuluttut)

[Ilanngussaq 5c](#) (kalaallisut)

[Ilanngussaq 5c](#) (tuluttut)

[Ilanngussaq 6](#)

[Ilanngussaq 7](#)

[Ilanngussaq 8](#)

[Ilanngussaq 9](#)